

De vòrm van herbest...

S ist der leist to va september, i pin do tsetzt en haus ont schau ka bòlket aus bail as de bòrt'n tua as kimm'p auer der kaffè. Olomerzn hear i timbl'n, s hòt an scheiket'n bint hait, an òst puck se ont macket as n dòch van an òltn kasòtt van hennen bou as iatz hòt s lai mear vier hennen drinn, de sai' ganua ver mi ont ver en mai' baib. S doi' haus, bou as hom òlbe vil lait drinn galep, a ker as de vòrt, hòt se galart, der mai' tata, de mai' mama ont de mai' nuna as sai' òlbe pet ins galep, sai' lengest storm ont van ingern viar kinder ist nea'met mear do: oa's ist storm as ist nou kloa' gaben, de ònder drai sai' gahaiert'n. Hait is an schea'n to va herbest, der bint tròk omanònder de laper van òlla de vòrm, as òmbiarn za voll'n oar van pa'm. Vour en bòlket van haus hòt s a schea'na pirch ont an kèrschpa'm, de hom schea'na vòrm ont benn as vinstre kimm'p ont de leist sunn ku'ket zbischn de raiser, parearts as de laicht'n. Der herbest hòt mer òlbe pfoll'n ober haier mòcht ter me loa'de, nou mear as sèll as de pin de doing leisnt mu'net'n. Endarbeil as der kaffè kimm'p auer, nimm i zboa kikerler ont an ettl'ena biskòtt'n, i gea' giatla giatla ka stiag au, òll scalì ist ver mi a groasa mia, zeiberst still i me a ker vour de tir van kommer, dòra tu i giatla au de tir, i bellet nèt aubecken s mai' baib, i boas as òll vòrt as de bòchet ist hòt se an groasn bea'ta. S sai' schoa' drai mu'net as de do en pett ist, s sai' drai mu'net as der biss'n as plaip en nea'mer vil za lem. I setz me semm as de karega nemm en pett ont schau sa u', de ist tschèppet ont garift, de sai' hònt drau as de lailicher ist asou moger as i tua me verchtn za nemmen sa en de mai'na hèn't, de ist haut ont pea'r. En de doing leist'n tag pariarts as de tuat nanket mear otnen va schbòch as de ist, i pin òlbe do, to ont nòcht, nem ir, ont òll to sich e as s liachtl van sai' lem pòl garift ist. De zait bar

nia ganua, benn as a mentsch a stickl va diar sèlber ist, abia as s mai' baib ist ver mi. Biar hom gahòt s glick za iberlem en krieg, òll to tu i petn en Gotterhear za gem er nou a ker zait za plaim pet de mai' Teresa, i boas as ist nèt rècht, i miat lai vergèlzigott song as der hòt mer tschenkt souvl zait, de mai'na leistn vevsk jor pet si sai' gaben ver mi de peistn jarder as de hat gameicht hom, i miat vroat ganua sai' as der Gotterhear hòt mer as en mai' be galeick s doi' baib, en an moment van mai' lem as i pin asou tschlècht plim as de hòn gamoa't za kinnen nea'mer aushòltn, ober iaz schau i sa u'...i pin nou nèt paroa't za lòn timer sa gea'. I pin nèt guat za sechen s mai' lem a'ne si, s ist lai van sèll to as de hòn sa kennt as i hòn òmbiar za lem. Vour as der herbest garift ist bart se nea'mer sai' ont de laper as hom en asou pfolln hait vluttern adur ont her vour en bòlket, s pariart as de kemmen sai' za griasn sa. S ist schoa nomitto, i hear de sai' hònt as meivert se en de mai', i heiv en kopf ont sich de sai'na schea'n plom ang as u'schaung me, s pariart as de bill eppes song ober de klòfft asou giatla as i muas me pucken pet de oar nem en sai' maul, men s de bill hearn de sai'na beirter. S earst ding as de vourst mer ist men s de laper van ingern pa'm sai' haier aa asou schea' abia de òndern jarder, dòra schauk se me u' ont sòk:"I muas der eppes voursn...i tant gearn nou a vòrt unter en inger pa'm gea' ont schaung abia der hom òlbe gatu'n de stern en himbl ont de laper as volln giatla giatla o de raiser ont leing se as de bis." I vercht me as tuatn nèt guat za gea' vour de tir pet en doi' bint, i tant liaber bòrt timer as der hoa'm geat, ober i boas as der hom nea'mer zait za bòrt timer. A'ne za song a bourt, nimm e sa en òrm, inn garirt en a deck, i trog sa anaus unter en pa'm, i leig sa nider ont leig me semm nem ir. Si schauk en himbl ont en pa'm, de laper vluttern omanònder, s pariart as de tòn timer ver ins. Der sai' otn ist òlbe schbecher, de druckt stòrch de mai' hònt, endarbail sòks e mer as de verchtet se za stèrm vavai de bill me nèt aloa' lòn timer. De sai'na ang sperrn se bider ont bail as de ròst timer tuat, òmbiar i za rearn, i boas nèt abia as de bar tea' a'ne si, van sèll to as i hòn sa pakemmp, hòn i nen gem s mai' gòn timer lem ont si s sai' en de mai'na hèn timer galeick. I hòn i aa de ang sperrt ont iaz sich i s mai' lem vour

de mai'na ang. Der mai' kòpf kèart um pet en gadenk vour 50 jor, i gadenk nou abia as hai' bar, en to as de sai'na ang hom pakemmp ver en earst vòrt de mai'n. S ist gaben en herbest van 1943, i pin gaben en campo va concentramento va Auschwitz, i pin semm gaben schoa' van a jor, ont en sèll jor hòn i tsechen ont augahòltn dinger as a mentsch miat nia sechen en sai gònz lem. Lai semm hòn i verstònne abia tznicht ont tumm as kinnen a toal lait sai'. Koa' mentsch kònn glam sèll as semm tschechen ist, de kelt, der hunger, de kleick, de stònk as kemmen ist aus van seng kamine van ouven bou as de nazistn hom verprennt de lait as de nea'mer praucht hom ont de seng òrmen kinder. Bos hom de seng gatu'n? I kannt nèt song viavl lait as i hòn tsechen stèrm nem miar, a toal va hunger, va kelt, vil sai' kemmen tschossn van nazistn vour de mai'na agn. An to hòn i tsechen de taitschn as hom anau hoa gavorven kloa'na kinder ont hom en tschossn abia za schiasn as an vougl, endarbeil hom sa galòcht viavl as de kinnt hom. En de segn jarder hòn i tsechen viavl kòlta lait a'ne hèrz as hòt as de bèlt. An to va herbest pin i aa asou schbòch, mia ont hungere gaben as i hòn nea'mer gabellt lem, i hòn nea'mer de kròft gahòt za gea' envir. I, as de hòn òlbe a groases glam gahòt, hòn i mer pfourst bou as der Gotterhear ist, abia as der kònn lòn timer tschechen òlls s doi'. S hòt mer pariart as sèll hat tschellt sai' ver mi der leist to, i hòn nèt kinnt bissn as i hat nou zboa' lòn timer jarder nou gamiast semm plaim. I hòn me gabellt lòn timer stèrm, i pin hinter de barake dur za suachen an plòtz bou nider leing me ont bòrt en toat. Benn as de pin glaim gaben en spinaret drot, hòn i tsechen vour miar a schea'na diarn as hòt me u'tschauk pet de sai'na plom ang, de hòt me u'galòcht ont hòt mer ear gareickt tschbisch en drot a tzoutna patat, i hòn sa ganommen ont gèssn vour de sai'na ang. De diarn hòt se pahenn keart ont ist pflouchen, men s de taitschn hattn sa tsechen hattn se sa tschossn. De sèll patat hòt vil gabellt song ver mi, de hòt mer bider gem de kròft za gea' envir, en sèll moment hòn i verstònne as hòt nou guata lait as doi' bèlt gahòt. I pin bider umkeart en de mai' baraka bou as der hom gamiast schloven oa's drau en ònder, as a herta vleick oder en dru. Mear as a vòrt,

benn as i pin augabòchen, hòn i an toatn mònn nem miar pfuntn. Van sèll to vort, i hòn gatu'n van òlls za hòltn me lebet, gor men s i pin òlbe hungere gaben, schbòch ont vil vòrt pfourn va kelt, i hòn gabisst as keing zobenz, òlbe de glaich stun, hinter de barake, bar kemmen de mai' Teresa, ont as òll to hatt se gahòt eppes ver mi, a stickl proat, a patat oder a ruab. I moa' as i hòn sa gearn gahòt van earst to her. I hòn galep ont ausgahòltn òlls lai ver en sèll moment. Der hom nèt vil klöff, der hom bea'ne zait gahòt ont der hom ens nèt verstònnen, sie hòt bea'ne beirter balsch kinnt, bea'ne gor taitsch, ont i hòn nanket a bourt va der sai' sprochen gabisst, ober s ist ganua gaben u'schaung se en de ang, plaim a ker pet de mai' hònt en de sai', za mòchen ens makn s hèrz. An to, no a jor as der kennt hom ens, hòt s e mer prink a packl pet drinn a sciarpa va bol, a stickl turt ont an kloa'n letratt pet tschrim hintn en sai' nu'm ont en sai' adress. En sèll to is Banechtn gaben ont sèll packl ist gaben ver mi s pest as i hòn en mai' gònz lem derbisst. S jor 1945 ist òmbiart, an to no en ònder is virpai gòngen, s ist nèt dèster gaben, ober a mentsch kònn aushòltn mear as sèll as moa't, ont asou an schea'n to hom ber tsechen de taitschn as pflouchen sai': s kriag ist garift gaben. De seng van Roat Kraitz hom me en Balschlònt umtrong, s ist tschechen òlls asou pahenn as i pin nanket paroat kemmen za griasn de mai' Teresa, ober en sai' letratt hòn i òlbe pet miar gahòt. I hòn bòlten zait gamiasst en spitoll plaim, vour za kearn bider um hoa'm, ober benn as i pin bider stercher gaben, s earst ding as i gatu'n hòn ist gaben nemmen an zug ver de Polonia za suachen de Teresa. Benn as de pfuntn hòn sa, hom ber ens augahòltn on gareart zòmmen, i hòn kennt de sai'na lait ont hòn tsechen abia òrm as de gaben sai', i hòn verstònnen as sèll as de prink hòt mer gahòt de Teresa hòt se van sai' maul vort ganommen. No a boch sai' ber peada do en Oachlait zòmmen gaben, der hom ens gahaiertn ont hom vier kinder gahòt ont gor men s der sai' òrm gaben, en ins hòt ens nicht pfallt. S ist nèt òlbe dèster gaben, ober der sai' envir gòngen 50 jor ont hom ens òlbe gearn gahòt, van earst to finz hait. Biar sai' gaben oa's a stickl van ònder, si ist de mai' kròft ont i ver si s glaiche, ont va

sèll muas i verstea' as i as de bèlt hat nèt kinnt voursn mear as sèll as i gahòt hòn. Endarbeil as i hòn s gònz mai' lem vour de ang tsechen, is tunkl kemmen, en himbl sicht men de earstn stern. De Teresa bòcht au, de schauk me u pet loadega ang, i puck me za pussn sa, ont hear de zachen as netzn de sai'na bònge. Iaz muas i sa lòngea', iaz muas i sa griasn. I hòlt sa glaim ka miar, stòrch, pet en mai' kopf as en sai' hor, i son en ver en leist vòrt as i hòn sa gearn ont si aa sogt mer s glaiche. Sie heift a ker en kopf, s leist bourt as de sòk ist “mama”, ont der sai' kopf vollt as de mai' òcksl. Iaz is e ver òlbe en a rua, koa' mear bea'ta ont koa' mear loat, i nimm sa ver en leist vòrt en de mai'na òrm, de mai'na zachen netzn sai hor, endarbeil de laper tònzn um ens, de schea'nesten leing se as n sai' hor ont de stern laichtn ver mi ont ver si, ver en leist vòrt do zòmme unter en inger pa'm.